

中國地方志集成

四川府縣志輯（新編）②②

光緒射洪縣志
（三）

民國遂寧縣志

道光蓬溪縣志

巴蜀書社 · 鳳凰出版社 · 上海書店

第二十二册

光緒射洪縣志（二）	一
民國遂寧縣志	一三五
道光蓬溪縣志	五三三

緒光

射洪縣志

(二)

清·黃允欽等
修 羅錦城等
纂

光緒十年刻本
十八卷首一卷

射洪縣志卷之十

藝文上

宸翰傳

聖訓銘

奏疏碑

賦贊

詩說

序跋

記論

漢班孟堅作藝文志其所記載類皆書名至明楊

升菴始變其例而以詩賦碑記諸類當之觀其言

曰陳子昂懸文宗之正鵠李太白耀風雅之絕麟

故升菴之志重其文非徒存其名也夫文敷陳其

事謂之賦發言為聲謂之詩意內言外謂之辭記

名其功謂之銘紀其功德謂之碑舉其綱要謂之

序紀錄事實謂之記纂集其美謂之讚述叙謂之

射洪縣志

卷六上

藝文宸翰

說直言謂之論是數者皆文類也我

國家

列聖相承

天章炳蔚凡有

宸翰

聖訓列於前以垂教萬世若夫賢才間出名人佳士

率多著作皆可臚列其文彙為一編間有因其體

製分是各門以備觀覽庶幾後來哲士披覽遺文

可以為知人論事之一助云志藝文

國朝

欽頒

御書墨刻書籍

康熙二十三年奉頒

御書萬世師表匾額一道

上諭講畧律例擬意一道

上諭講訓一道嘉禾圖一道

雍正四年奉頒

御書生民未有匾額一道

射洪縣志

卷六上

藝文宸翰

雍正八年

勅建平定青海碑於學宮

乾隆三年奉頒

御書與天地參匾額一道

乾隆十四年奉頒

聖諭廣訓十二本

天章炳誠一本

祀典圖冊一本

學政全書二本

二

軍流道里表一部

欽定三流道里表一部

刑名例限一本

洗冤錄一部

停刑日期考一本

大清律例一部

續纂條例一部

欽定吏部處分則例一部

工程做法一部

射洪縣志

卷六上

藝文 宸翰

三

乾隆十八年續頒

督捕則例二本

欽定科場條例四本

酌歸簡易條款一本

欽定學政全書一部

乾隆二十二年頒發

學政全書一部

三禮義疏一部

乾隆二十三年頒發

大清律例四本

御製詩集一部

御製文集一部

乾隆五十一年奉頒

御論墨刻一道

乾隆五十二年奉頒

御製補笙詩樂譜二本

御定聖廟樂譜一本

戶部則例一部

射洪縣志

卷六上

藝文 宸翰

四

乾隆五十三年奉頒

御筆仿李廸雞雛待飼圖詩畫一道

乾隆五十五年奉發

戶部續纂則例一部

乾隆五十七年奉發

科場條例一部

嘉慶元年奉頒

欽定學政全書一部

嘉慶五年奉發

御製邪教說墨刻一道

御書聖集大成匾額一道

嘉慶十年奉發

勤政殿記墨刻一卷

嘉慶十四年奉發

御題耕織圖詩墨刻一道

嘉慶十九年奉頒

學政全書一部

嘉慶二十三年奉頒

射洪縣志

卷六上

藝文 宸翰

五

朱子全書一部

道光元年奉頒

御書聖協時中匾額一道

咸豐元年奉頒

御書德齊情載匾額一道

同治元年奉頒

御書聖神天縱匾額一道

光緒元年奉頒

御書斯文在茲匾額一道

聖訓

嘉慶五年閏四月

上諭據勒保奏查明賊匪竄渡嘉陵江潼河疎防各文

武分別嚴審定擬一摺此案太和鎮一帶原有分

派防守官兵嗣經魁倫因賊匪竄近鹽亭卽親寫

手字令百祥等將沿河兵勇一併帶回並專差

持令將張續所帶兵勇全行撤回大營以改該處

無兵堵禦魁倫實屬罪無可逭所有勒保奏到魁

倫原信及批稟應俟魁倫解到詰訊外至劉清在

射洪縣志

卷六上

藝文 聖訓

六

潼綿一帶巡防時贈太和鎮一帶淺灘要隘鄉勇

難恃稟請魁倫欲留貴州新到兵丁未經批准而

賊匪旋即由太和鎮踰淺過河是劉清先能見到

其咎尚有可原且伊平日居官能得民心着加恩

以知縣用如此後仍能奮勉出力着勒保據實

保奏至遊擊王之鑑於賊匪搶渡王家嘴地方雖

非專管但駐紮之大井口相距甚近

按大井口既卽古井口

未預爲嚴防又不能奮力擊退實屬疎玩僅擬枷

號半年發遣尚覺稍輕王之鑑着在太和鎮地方

柳號一年俟川省軍務辦竣再行開柳發往伊犁

充當苔差其通判連彭年究屬文員且經身受子

傷着照擬發往伊犁効力贖罪知縣孫熙及其餘

疎防員弁俱着照所擬辦理前此踣淺過河圍首

文大魁所帶鄉勇因寡不敵眾被賊殺死八十三

人俱着咨部賜卹將此由六百里諭令知之欽此

按上諭極長今採其事切射洪者恭載於此

明穆宗諭祭楊最文

惟爾秉剛貞之氣懷忠藎之心才華著譽於甲科

射洪縣志

卷六上

藝文 聖訓

七

讜論馳聲於朝亡官常恪守而志尤在格君國是

力持而身罔知避患太僕既陟馬政聿新効碎首

以抗章祗深社稷之慮屬批鱗而致杖竟為泉壤

之遊耿耿忠魂昂昂大節在先帝已嘉其直特霽

遺恩惟朕躬重惜其冤聿頒卹典易名忠節贈秩

臺端祭葬駢加寵榮畢備惟靈不昧尚克欽承

莊烈帝賜蒲烈女詩

未親夫面繼夫亡不比尋常烈女行白髮尚難堅

晚節青年誰肯負春光魂歸天上星辰朗骨葬山

中草木香朕淚等閒不輕灑女為千古正綱常

經籍

中庸集說敎蒙一卷

明謝東山著

易學駢來錄一卷

鳳翔楊甲仁著

史部

後史

無卷數 唐陳子昂著盧藏用曰子昂誠國史藁

奏議一卷

陳子昂著

江上人文論陳子昂著

射洪縣志

卷六上

藝文 經籍

貴陽圖考二十六卷

謝東山著

嘉靖貴州通志十二卷

謝東山刪正東山官貴州按察司副史刊定此書頗為簡畧以

孝義隱逸別於人物之外而如陸京張伯安諸人又以孝友入

人物志亦無體例也

射洪縣志稿

李森著

射洪縣志

郭鐘著

隴起雜事

楊儀著其書多紀明玉珍事迹

保臺實績錄一卷

國朝不著撰人名氏紀台州兵燹道楊應魁政績

射洪縣志十卷

唐麟翔著

成縣志 無卷數、黃泳著

射洪縣志八卷 張松孫著

子部

日華子 無卷數 陳子良著

廣前定錄七卷 五代蜀馮鑑撰

續事始五卷 晁公武曰馮鑑撰廣孝孫著

吉凶影響錄 宋岑象求編晁公武曰象求熙寧之末問居江陵披閱載籍見善惡報應事輒刪潤而記之問有聞見者難乎備載亦採摘著於篇

國乘紀要功罪四書 證性秘密 金華浪語 楊嗣龍著

射洪縣志 卷六上 藝文 經籍

衡外瑣言 羅附賢著

下學錄一卷 國朝 楊甲仁著

憂患錄一卷 楊甲仁著

遊城北錄 楊甲仁著

芙蓉日錄 楊甲仁著

了心宗傳 楊甲仁側室周氏著

金剛經解 大覺寺僧明良著

集部

陳子昂集十卷 唐 陳子昂著通志子昂始變文格其詩為唐初之冠其文自駢偶諸篇外散

補履集十卷 李浦著

體皆疏樸近古故韓愈柳宗元皆稱之

文泉子十卷

劉蛻著蛻大中間流寓射洪自序謂蜀以九流之旨曰文泉以不竭之源曰泉故命曰文泉其文多摹倣楊雄而大旨與元結相出入欲掇未俗反之古然所謂古者乃黃老之清靜是則唐人之見耳

修文要訣二卷 五代蜀馮鑑著

四箴集 宋 謝坦著

三樂集元 李通仁著

宦轍存稿 明 楊澄著

射洪縣志 卷六上 藝文 經籍

果齋集 無卷數楊最著

正誼集 無卷數何仕蹟著

近譬軒集四十卷 點中小稿 無卷數謝東山著

詩話四卷 謝東山著

楊氏文集三卷 楊嗣龍著其書多採楊澄楊最章疏及手書所為詩文諸名士贈答詩序記銘等類彙為文集凡三卷

已露詩集一卷 僧已露著

柴坡詩集 國朝 廖有恒著分志道據德依仁游藝四集

蜀遊草 唐麟翔著

玉壘詩集八卷 張星瑞著

陽安詩草二卷 楊 湘著

諸海遏盜數策 趙燮元著

讀易管見二卷 趙燮元著

知非齋二卷 澹遠軒四卷 趙燮元著

性原一篇 虎帳元機四卷 趙燮元著

四書日新編八卷 楊芳春著

讀禮屢心錄二卷 楊芳春著

詩攷一卷 楊芳春著

射洪縣志 卷六上 藝文 經籍 七

內省日錄二卷 楊芳春著

家範文集一卷 楊芳春著

孝經註解 謝紹伯著

半古齋詩集 楊均著

後正誼集一卷 于靖安著

古本大學集註一卷 劉國翼著

籌荒策一卷 劉國翼著

按諸海遏盜以下均近代人作故不分經史記之

奏疏附書

論調元氣疏

唐陳子昂

臣聞之於師曰元氣者天地之始萬物之祖王政

之大端也天地莫大於陰陽萬物莫靈於人王政

莫先於安人故人安則陰陽和陰陽和則天地平

天地平則元氣正先王以人之通於天地也於是

養成羣生以順天德使人樂其業甘其食美其服

然後天瑞降地符升雨暘時若草木茂遂故顓頊

唐虞不敢荒盪其書曰百姓昭明協和萬邦黎民

於變時雍乃命羲和欽若昊天歷象日月星辰敬

射洪縣志 卷六上 藝文 奏疏 七

授人時和之得也夏商之衰桀紂昏暴陰陽乖行

天地震怒山川鬼神發奸見災疾疫大興終以滅

亡和之失也迨周文武創業誠信忠厚加於百姓

故成康刑措四十餘年天人方和而幽厲亂常苛

慝暴虐詆黷天地山川沸崩人用咨怨其詩曰昊

天不惠降此大戾不先不後爲虐爲瘵顧不哀哉

近代隋煬帝恃四海之富鑿渠決河自伊洛屬之

揚州疲生人之力洩元氣之藏中國之難起故身

死人手宗廟爲墟逆元氣之理也臣觀禍亂之動

天人之際先師之說昭然著明不可欺也陛下舍
天地之德日月之明渺然遠思欲求太和此伏羲
氏所以爲三皇首也昔者天皇大帝握元符東封
泰山然未見明堂宮上帝使萬世鴻業闕而不昭
殆留此盛德以發揮陛下哉臣謂和元氣睦人倫
舍此則無以爲也昔皇帝合宮有虞總章堯衢室
夏世室皆所以調元氣治陰陽也
諫開告密疏

臣聞隋之末代天下猶平楊玄感作亂不數月而

射洪縣志

卷六上

藝文 奏疏

主

敗天下之弊未至土崩煬帝不悟專行屠戮大窮
黨與遂至殺人如麻流血成澤天下靡然始思爲
亂於是雄傑並起而隋族亡矣前事之不忘後事
之師也伏惟陛下念之

爲政條奏八科疏

一措刑二官人三知賢四去疑
五招諫六勸賢七息兵八撫靈臺

臣觀聖人用刑貴適時變有用有舍不專任之且聖人初

制天下必有凶亂之賊叛逆之臣而爲驅除以顯

聖德聖人誅凶殄逆濟人甯亂必資刑殺以清天

下故所以務用刑也凶亂既滅聖道既昌則必順

人施化赦過宥罪所以致刑措也然則聖人用刑
本以禁亂亂靜刑息不爲昇平所設何者太平之
人悅樂於德不悅樂於刑以刑窮人人必慘怛故
聖人貴措刑不貴煩刑今神皇應運受圖臨御天
下逆臣賊子頓伏嚴誅所虺貞羣黨同惡就戮此
蓋天意將顯神皇威靈豈此凶徒所能自亂今魁
首已滅朋黨已屠聖政惟昌天下威服神皇又降
文昌鴻恩滌蕩羣罪天下昭慶企望日新措刑崇
德正在今日實聖政之至要者也近日詔獄猶滋

射洪縣志

卷六上

藝文 奏疏

古

鉤捕支黨株蔓難窮蓋獄吏不識天意以抵慘刻
誠宜廣愷悌之道救法慎罰省白誣冤此太平甯
人之務也官人惟賢政之所以治也然君子小人
各尚其類若陛下好賢而不任任而不能信信而
不能終終而不能賞雖有賢人終不肯至又不肯
勸反是則天下之賢集矣議者乃云賢不可知人
不易識臣以爲固易知固易識夫尚德行者必無
凶險之類務公正者必無邪佞之朋保廉節者必
憎貪冒之黨有信義者必疵苟且之徒知者不爲

射洪縣志

卷六上

藝文 奏疏

五

愚者謀勇者不爲怯者死猶梟鸞不接翼董獲不共器此天地之性物類之情其理自然不可改易何者以德事凶兩不相入以正攻佞兩不相利以信質僞兩不相從以廉說貪兩不相和知者尚謀愚者不聽勇者殉死怯者貪生此皆事業不同趣向各反賢人之道固可預知誠能尚賢賢可至矣且賢人未嘗不思効用顧無其類則難進是以涇汨於時誠能信任俊良知左右有灼然賢行者賜之尊爵厚祿使以類相舉則天下之理得矣臣伏惟神皇聖明具知得賢須任任既須信既信須終既終須賞悉備知也然今未能信任者應以無效致疑如裴炎劉禪之蹇味道周思茂背德孤恩也以臣愚識則謂不然何者聖必藉賢以明國必待賢以昌人必待賢以理物必待賢以甯況聖躬不可勞弊神心不可細用賢人於國亦猶食之在人固不可一噎而絕喉糧亦不可以謬一賢而遠正士也聖人大德在能納諫太宗德參三王而能容魏徵之直今誠有敢諫骨鯁之臣深謀遠識之士激

射洪縣志

卷六上

藝文 奏疏

六

昂慷慨憤不顧身面折廷爭不避斧鉞陛下誠能廣延順納凡進諫者皆賜獎勵又於納諫時少霽威嚴使得畢盡所呈不懷顧畏然後採其芻蕘以新盛德則大小臣僚孰不謂陛下垂如天之仁有容諫之美上可繼太宗從諫弗拂之休下以開人臣讜論直言之路而萬世之後且歸美於陛下矣臣聞勞臣不賞不可勸功死士不賞不可勸勇今或勤勞死難名爵不及偷榮尸祿寵秩妄加非所以表勲庸勵德行也願陛下表顯徇節勵勉百僚古之賞一人千萬人悅者蓋云賞也今事之最大者兵革歲興賦役不省興師十萬則百萬之家不得安業自有事北狄於今十年不聞中國之勝以庸將馭冗兵徭役日廣兵甲日敝願審量損益計利害勢有不可毋虛出兵則人安矣虺賊干紀自取屠滅罪止魁逆無復緣坐宗室子弟皆得更生然臣願陛下重曉諭之使明知天子慈仁得以自安臣聞宗室者陛下之手足也手足有疾則身不甯身不甯則心憂宗室子弟不安則罹罪罹罪則

誅誅則株累多株累多則自賊其肢體而身與心爲一
注矣夫人情以不能自明則疑疑則懼懼則罪生今
宗室子弟固無人不疑懼矣昔者周公謂魯公曰
君子不施其親是在一國猶宜親親況陛下撫有
四海天下之民尚思得所乃令一家子弟懷疑懼
罪可乎惟賜愷悌之德使居無過之地體恤撫慰
不至憂讒則宗室安矣

請興明堂太學疏

臣聞明堂有天地之制陰陽之統二十四氣八風

射洪縣志

卷六上

藝文 奏疏

七

十二月四時五行二十八宿莫不率備王者政失
則災政順則祥臣願陛下爲唐恢萬世之業相國
南郊建明堂與天下更始按周禮月令而成之乃
月孟春乘鸞輅駕蒼龍朝三公九卿於青陽左个
負斧扆憑玉几聽天下之政躬籍田親蠶以勸農
桑養三老五更以教孝弟明詔獄以息淫刑修文
德以止干戈察孝廉以除貪吏後宮非妃嬪御女
者出之珠玉錦繡雕琢技巧無益者棄之巫鬼淫
祀災惑人心者禁之臣謂數朞月見太平云陛下

方興大化而太學久廢堂室埃蕪詩書不聞
尚未及之愚臣所以私憾也太學者政教之地也
君臣上下之所取則也俎豆揖讓之所興也天子
於此得賢臣焉今委而不論雖欲睦人倫興治綱
失之本而求之末不可得也君子三年不爲禮禮
必壞三年不爲樂樂必崩奈何爲天下而輕禮樂
哉願引胄子使歸太學國家之大務不可廢也
中書省條上利害三事全文

九道出大使巡按天下申黜陟求人瘼臣謂計有

射洪縣志

卷六上

藝文 奏疏

六

未盡也且陛下發使必欲使百姓知天子夙夜憂
勤之意也羣臣知考績而任之也姦暴不逞知將
除之也則莫如擇仁可以恤孤明可以振滯剛不
避強禦知足以照奸者然後以爲使故輶軒未動
而天下翹然恃之矣今使且未出道路之人皆已
指笑欲望進賢下不肖豈可得耶宰相奉詔書有
遣使之名無任使之實使愈出天下愈敝徒令百
姓治道路送往迎來不見其益也臣願陛下更選
有威重風概爲衆推者因御殿前以使者之禮禮

之諄諄戒勅所

出使之意乃授以節自京師及

州縣登拔才良求人瘼宣布上意令若家見而戶

曉昔堯舜不下席而化天下蓋黜陟幽明能折哀

者陛下知難得人則不如少使彼煩數而無益於

化是烹小鮮而數撓之矣

刺史縣令政教之首陛下布德澤下詔書必待刺

史縣令謹宣而奉行之不得其人則委棄有司挂

牆屋耳百姓安得知之一州得才刺史十萬戶賴

其福得不才刺史十萬戶受其困國家興衰在此

射洪縣志

卷六上

藝文 奏疏

九

職也今吏部調縣令如補一尉但計資考不求賢

良有如不次用人則天下囂然相謗矣狃於常而

不變也故庸人皆任縣令教化之陵遲顧不甚哉

天下有危機禍福因之而生機靜則有福動則有

禍百姓安則樂生不安則輕生是也今軍旅之弊

夫妻不得安父子不相養五六年矣自劍南盡河

隴山東由青徐曹汴河北舉滄瀛趙鄭或困水旱

或頓兵役死亡流離畧盡尚賴陛下憫其失職凡

兵戍調發一切罷之使人得妻子相見父兄相保

可謂能靜其機也然臣恐將相有貪夷狄利以廣

地強武說陛下者欲動其機機動則禍構宜修文

德去刑罰勸農桑以息疲民蠻夷中國有聖王必

累譯至矣

附諫武攸宜書

主上應天順人百蠻向化大王以元老懿親威畧

邁世受律廟堂精兵百萬傾天下以事一隅此猶

舉泰山而壓卵建瓴破竹之勢也然而張元遇王

孝傑等不謹師律由此長敵威而殆戰士夫敵威

射洪縣志

卷六上

藝文 奏疏

十

長則難以爭鋒戰士殆則無以制變今敗軍之後

天下側耳草野傾聽國威今大王冲謙退讓法制

不申每事同前何以統衆前如兒戲後如兒戲豈

徒爲敵人所輕亦生天下奸雄之心聖人威制六

合故用聲爾非能家至戶到然後可服况貴兵先聲

今發半天下兵以屬王安危成敗在百日之內何

可輕以爲尋常大王若聽愚計即可行若不聽即

無功矣須成功報國可送身悞國耶伏乞審聽請

盡至忠之言凡事須量智愚衆寡勇怯強弱部校

將帥之勢然後可以合戰求利以長攻短令皆向
前不量力又不簡練暗驅烏合敗後怯兵何由取
勝僕一愚夫猶言不可況奸賊勝氣十倍未可當
也且統衆禦奸須有法制親信若單獨一身則朱
亥金鉞有竊取之勢不可不畏人有負垂棘之寶
行於途必被劫賊何者爲寶重人愛之今大王位
重又總半天下兵豈直垂棘而已天下利器不可
失一失卽後有聖智之力難爲功也故願大王於
此決策非小讓兒戲可了若此不用忠言則至時

射洪縣志

卷六上 藝文 奏疏

三

機已失機與時一失不可再得願大王熟察大王
誠能聽愚計乞分麾下萬人以爲前驅則大王之
功可立也

諫絕十姓君長書

國家能制十姓者由九姓强大臣服中國故勢微
弱委命下吏今九姓叛亡北番喪亂君長無主回
紇殘破磧北諸姓已非國有皆欲犄角亡叛惟
金山諸番共爲形勢有司乃以揚名擅破回紇歸
十姓之罪拒而遣還不使入朝恐非羈戎之長策

射洪縣志

卷六下 藝文 奏疏

三

也夫戎有鳥獸心親之則順疑之則亂今阻其善
意則十姓內無國家親信之恩外有回紇報讎之
患懷不自安烏駭狼顧則河西諸番自此拒命矣
且夷狄相攻中國之福今回紇已破旣無可言十
姓非罪又不當絕罪止揚名足以慰其脅領矣近
詔同城權置安北府其地當磧南口制匈奴之衝
常爲劇鎮臣頃聞磧北突厥之歸者已千餘帳來
者未止甘州降戶四千帳亦置同城今磧北喪亂
荒饉之餘無所存仰陛下開府招納誠覆全戎狄
之仁也然同城大興儲峙而降附番落不免饑寒
更相剽掠今安北有官牛羊六千粟麥萬斛城孤
兵少降者日衆不加救恤盜劫日多夫人情以求
生爲急今有粟麥牛羊爲之餌而不救其死安得
不爲盜乎盜興則安北不全甘涼以往躋以待陷
後爲邊患禍未可量是則誘使誨亂之道也且夷
狄代有雄傑與中國抗有如勃起招合遣散衆將
特興此國家大機不可失也河西諸州軍興以來
公私儲蓄尤可嗟痛涼州歲食六萬斛屯田所收

不能償墾陛下欲制西河定戎亂此州空虛未可
動也甘州所積四十萬斛觀其山川誠河西咽喉
地北當九姓南偏吐蕃奸回不測伺我邊罅故甘
州地廣粟多左右受敵且戶止三千勝兵者少屯
田廣夷倉庾豐衍瓜肅以西皆仰其餽一旬不往
士已枵饑是西河之命係於甘州矣且其四十餘屯
肥瘠早潦不待天時歲取二十萬斛但人力寡乏
未盡墾發異時吐蕃不敢侵者由甘涼士馬彊盛
以抗其入今甘州積粟萬計兵少不足以制賊若

射洪縣志

卷六上

藝文 奏疏

三

土蕃敢大入燔蓄積蹂躪諸屯則河西諸州我何以
守宜益屯兵外得以防盜內得以營農取數年之
收可保四百萬則天兵所臨何求不得哉

奏論東都可營山陵疏

臣聞秦據咸陽漢都長安山河爲固而天下服者
以北假胡宛之利南資巴蜀之饒轉關東之粟而
取山西之寶長羈利策橫制宇宙今則不然燕代
迫匈奴巴隴嬰吐蕃西老千里羸糧北丁十五乘
塞歲月奔命秦之首尾不完所餘獨三輔間耳顧

射洪縣志

卷六上

藝文 奏疏

四

遭荒饉百姓薦饑自河而右惟有赤地循隴以北
不逢青草父兄轉徙妻子流離賴天悔禍去年薄
稔贏耗之餘幾不沉命然流亡未還白骨縱橫阡
陌無王至於蓄積尤可哀傷陛下以先帝遺意方
大駕長驅按節西京千乘萬騎何從仰給山陵穿
腹必資徒役率羶微之衆與數萬之軍調發近畿
督扶疲老鏹山輦石驅以就功春作無時何望有
秋彫配遺囑再罹艱苦有不堪其困則逸爲盜賊
揭挺叫嘯可不深圖哉且天子以四海爲家舜葬
蒼梧豈愛夷裔而鄙中國耶示無外也周平王漢
光武都洛而山林寢廟並在西土者實以時有不
可故遺小存大去禍取福也今景山崇秀北對嵩
邙右眄汝海視融太昊之故墟在焉園陵之美復
何以加且太原蓄鉅萬之倉洛口儲天下之粟乃
欲舍而不顧倘鼠竊盜西入陝郊東犯虎牢取敖
倉一杯粟陛下何以過之

諫開蜀山討生羗因襲吐蕃書

竊聞國家欲開蜀山自雅州道入討生羗因以襲